



Broj: 12-08-5-916-49/2016
Sarajevo, 10.06.2016. godine

n/r Svi predsjednici općinskih/osnovnih sudova
n/r Svi predsjednici kantonalnih/okružnih sudova

Predmet: Promotivna aktivnost - obavijest za stranke za „Sedmice sudske nagodbe“

Poštovani,

Kako ste već upoznati, u periodu od 01.-17. oktobra 2016. godine u svim prvostepenim i drugostepenim sudovima u Bosni i Hercegovini provoditi će se aktivnost „Sedmice sudske nagodbe“.

Svrha organizovanja aktivnosti „Sedmice sudske nagodbe“ jeste rješavanje što većeg broja predmeta mirnim putem, što može imati dalji pozitivan uticaj na efikasnost sudskih postupaka. Ovom aktivnosti Visoko sudsko i tužilačko vijeće BiH (VSTV BiH), u okviru Projekta unapređenja efikasnosti pravosuđa II koji implementira, želi uticati na promjenu pristupa suda i stranaka rješavanju sporova, gdje se kao prioritet postavlja brzo i efikasno rješavanje, s akcentom na zadovoljstvo stranaka na ishod spora i uslugu suda.

Na XII Konferenciji predsjednika sudova u Bosni i Hercegovini, održanoj 30. maja 2016. godine predstavljen je plan promotivnih aktivnosti koje će zajedno preduzeti VSTV BiH i sudovi tokom pripreme „Sedmica sudske nagodbe“. Jedna od tih aktivnosti jeste dostavljanje obavijesti strankama, kojom se pružaju informacije o ovoj aktivnosti i prednostima sudske nagodbe kao mirnom načinu rješavanja spora.

U tu svrhu, VSTV BiH je izradio unificirani obrazac – „Obavijest za stranke“, čiji sadržaj je usvojen od strane Stalne komisije za efikasnost sudova na sastanku održanom 09. juna 2016. godine, a koji Vam dostavljamo u prilogu ovog dopisa.

VSTV BiH poziva predsjednike sudova i sudije/stručne saradnike da obavijest u prilogu dostave strankama u predmetima koji se vode pred sudom, odnosno da koriste istu za obavješavanje šire javnosti (putem web portala, oglasnih ploča u sudu i dr.), u formi koju smatraju prikladnom.

Podsjećamo i na zaključak sa XII Konferencije predsjednika sudova, u skladu s kojim će „sudovi aktivno promovisati sudsku nagodbu kao efikasan način rješavanja sporova“, te se nadamo da Vaša puna saradnja neće izostati.

Napominjemo da će VSTV BiH će s posebnom pažnjom pratiti pripreme aktivnosti, kao i izraditi detaljan izvještaj o ostvarenim rezultatima aktivnosti „Sedmice sudske nagodbe“ za svaki sud. Na ovaj način unapređujemo kapacitete članova pravosudne zajednice za rad sa strankama, a istovremeno ispunjavamo strateške ciljeve pravosuđa u ovoj oblasti.

S uvjerenjem da će aktivnost „Sedmice sudske nagodbe“ biti realizovana na obostrano zadovoljstvo sa velikim uspjehom, srdačno Vas pozdravljam.

S poštovanjem,



Prilog:

- Obavijest za stranke – „Sedmice sudske nagodbe“

Dostavljeno:

- Naslovu;
- a/a

OBAVIJEST ZA STRANKE
„Sedmice sudske nagodbe“

Poštovani,

Ovim putem želimo da Vas informišemo o provođenju aktivnosti „Sedmice sudske nagodbe“ u našem Sudu.

Na inicijativu Visokog sudskog i tužilačkog vijeća BiH u svim prvostepenim i drugostepenim sudovima u BiH organizuje se provođenje aktivnosti „Sedmice sudske nagodbe“.

Period implementacije aktivnosti je 01.-17. oktobar 2016. godine.

Cilj organizovanja „Sedmica sudske nagodbe“ jeste rješavanje što je moguće većeg broja predmeta mirnim putem, u skraćenom postupku, koji je ekonomičniji i brži za stranke. Na ovaj način se želi izvršiti pozitivan utjecaj na efikasnost sudskih postupaka te promjenu pristupa suda i stranaka rješavanju sporova, gdje se kao prioritet postavlja brzo i efikasno rješavanje, s akcentom na zadovoljstvo stranaka na ishod spora i uslugu suda.

U skladu sa navedenim pozivamo sve zainteresovane stranke, a čiji se predmeti vode pred ovim Sudom, da u navedenom periodu pristupe sudu te riješe svoj predmet sudskom nagodbom.

Ukoliko želite Vaš predmet riješiti sudskom nagodbom to možete učiniti na način da informišete sudiju koji vodi Vaš predmet, na jedan od sljedećih načina:

- samostalno ili preko svog zastupnika uputite pismeni prijedlog za zaključenje sudske nagodbe;
- samostalno ili preko zastupnika kontaktirajte sudiju kako bi zajednički dogovorili termin za ročište za sklapanje sudske nagodbe;
- zajedno sa suprotnom strankom, te zastupnikom ukoliko ga imate, u toku navedenog perioda, pristupite na sud sa prijedlogom za zaključenje sudske nagodbe.

Prednosti sudske nagodbe

Sudska nagodba predstavlja:

Kraći i efikasniji postupak

Vaš spor se okončava zaključivanjem sudske nagodbe pred prvostepenim sudom. Sporazum stranaka se unosi u zapisnik koji stranke potpisuju. Sudska nagodba ima status izvršne isprave, bez drugostepenog žalbenog postupka u predmetu.

Jeftiniji postupak

Sudska nagodba je privilegovana sa aspekta plaćanja sudske takse, a prema odredbama Zakona o sudskim taksama. Zaključivanje sporazuma među strankama znatno skraćuje vrijeme trajanja spora, te na taj način reducira i ostale potencijalne troškove nastale u vezi sa sudskim postupkom.

Jednostavniji postupak

U slučaju da se spor riješi zaključenjem sudske nagodbe stranke i sud su pošteđeni dugotrajnog vođenja postupka, nepotrebnog pribavljanja i izvođenja dokaza, odlaganja/odgađanja ročišta, dugotrajnog postupka namirenja, eventualnog drugostepenog postupka te dodatnih troškova koji nastaju pri tome.

Sigurnost i povjerenje

Sudska nagodba je izvršna isprava – stranke su u obavezi postupiti prema dogovoru navedenom u zapisniku o sudskoj nagodbi, jednako kao po pravosnažnoj i izvršnoj presudi. U slučaju da dužnik ipak ne postupi po postignutoj nagodbi, na osnovu nje je moguće pokrenuti postupak za prinudnu naplatu (izvršni postupak). Time se stranke oslobađaju dodatnog vođenja parničnog postupka pred sudom.

Prednost rješenja spora između stranaka zaključenjem sudske nagodbe je i očuvanje poslovne saradnje ili privatnih odnosa između stranaka u postupku. Prilikom zaključenja sudske nagodbe stranke same biraju način rješenja spora i nagodba predstavlja njihov međusobni dogovor. U tom slučaju istinski sami odlučujete o sudbini Vašeg spora.

S poštovanjem
